

REGLUR

byggðasamlags um málefni fatlaðra á Norðurlandi vestra um dagþjónustu og aðstoð vegna atvinnu fyrir fatlað fólk.

1. gr.

Markmið.

Fatlað fólk skal njóta félagslegrar hæfingar og endurhæfingar í þeim tilgangi að draga úr áhrifum fötlunar og auka hæfni þess til starfa og þátttöku í daglegu lífi.

Einnig skal aðstoða fatlað fólk við að finna störf við hæfi og veita því aðstoð við að sinna störfum á almennum vinnumarkaði.

Til þess að ná þessum markmiðum er rekin dagþjónusta á starfssvæði byggðasamlagsins, sbr. 9. og 26. gr. laga nr. 59/1992 um málefni fatlaðs fólks. Ávallt skal leitast við að veita fötluðu fólki þjónustu skv. almennum lögum og úrræðum áður en gripið er til sértækra úrræða skv. þessum verklagsreglum.

2. gr.

Skipulag.

Byggðasamlagið sem samanstendur af Húnaþingi vestra, Húnavatnshreppi, Blönduósbæ, Skagabyggð, Sveitarfélaginu Skagaströnd, Sveitarfélaginu Skagafirði, Akrahreppi, Fjallabyggð og Dalvíkurbyggð annast framkvæmd sértækrar félagsþjónustu á svæðinu samkvæmt samningi sveitarfélaganna dags. 29. desember 2010.

Á þjónustusvæðinu eru starfræktar iðjur, dagvistir og hæfing og aðstoð við vinnu á almennum vinnumarkaði (AMS).

Allir íbúar með lögheimili á þjónustusvæðinu eiga rétt til þjónustunnar að uppfylltum öðrum viðmiðum skv. reglum þessum.

3. gr.

Hverjir eiga kost á þjónustu.

Þjónustan er ætluð þeim sem vegna skertrar vinnugetu þurfa sérstaka aðstoð við þátttöku á vinnumarkaði eða sérhæfð úrræði dagþjónustu vegna fötlunar sinnar.

Þjónusta er veitt á grundvelli einstaklingsbundins mats og þjónustuáætlunar sem tekur mið af getu og þörfum hvers og eins og þeim möguleikum sem finnast á hverjum stað.

4. gr.

Þjónustuúrræði.

Eftirfarandi þjónusta er í boði fyrir einstaklinga með lögheimili á starfssvæði byggðasamlagsins:

- a) Hæfing – starfs- og félagsleg þjálfun.
- b) Iðja – félagsþjálfun og einföld vinnuverkefni.
- c) Starfsendurhæfing.

Þessi þjónusta er í boði á eftirtöldum stöðum, eftir metinni þörf hverju sinni:

Iðju á Siglufirði.

Iðju á Sauðárkróki.

Iðju á Blönduósi.

Iðju á Hvammstanga.

- d) Aðstoð við atvinnu á almennum vinnumarkaði (AMS) er að auki veitt þar sem hennar er þörf.

5. gr.

Samvinna.

Lögð skal áhersla á samvinnu við Vinnumálastofnun og Virk–starfsendurhæfingarsjóð, eftir því sem við á.

6. gr.

Umsókn.

Sótt er um þjónustu hjá félagsþjónustu á þar til gerðum eyðublöðum. Sótt er um þjónustu hjá því sveitarfélagi sem viðkomandi á lögheimili í eða hjá þeirri félagsþjónustu sem ber ábyrgð á þjónustunni. Umsóknir eru gildar þegar umsækjandi hefur náð 18 ára aldri.

7. gr.

Fundur ráðgjafa félagsþjónustu með umsækjanda eða aðstandanda hans.

Fundur með ráðgjafa skal haldinn innan tveggja vikna frá því að umsókn barst. Lagt er mat á þörf fyrir þjónustu í samráði við umsækjanda. Sé niðurstaða matsins sú að þörf fyrir þjónustu sé önnur eða víðtækari en veitt er samkvæmt lögum um félagsþjónustu sveitarfélaga skal sérstakt teymi fagfólks meta sérstaka stuðningsþörf umsækjanda.

8. gr.

Teymi fagfólks.

Teymi fagfólks skv. 3. mgr. 5. gr. laga nr. 59/1992 um málefni fatlaðs fólks starfar á hverju þessara þjónustusvæða: Húnaþingi vestra, Austur-Húnavatnssýslu, Skagafirði, Fjallabyggð og Dalvíkurbyggð. Félagsmálastjóri á hverju svæði ber ábyrgð á því að teymi sé virkjað. Teymið samanstendur að lágmarki af þremur fulltrúum skipuðum af félagsmálastjóra. Teymið samanstendur eftir atvikum af ráðgjafa, forstöðumanni iðju og AMS.

- a) Teymið metur heildstætt sérstaka stuðningsþörf í samráði við umsækjanda eða aðstandanda hans. Niðurstaða um mat á þörf og úrræði skal liggja fyrir eigi síðar en þremur mánuðum eftir að umsókn berst teyminu. Ef umsækjandi er ekki sáttur við mat teymis fagfólks þá ber ráðgjafa að aðstoða umsækjanda við að koma þeim athugasemdum til þjónustuhóps.
- b) Teymið sendir niðurstöðurnar til umsækjanda. Teymið skráir umfjöllun um umsóknir og ákvarðanir í fundargerð.

9. gr.

Málsmeðferð.

Umsókn og tillaga teymi fagfólks um þjónustu er afgreidd af viðkomandi félagsþjónustu sem tekur ákvörðun um hversu mikil þjónusta skuli veitt og hvert fyrirkomulag hennar verði. Leita skal umsagnar þjónustuhóps byggðasamlags um málefni fatlaðra sé þess þörf s.s. í veigameiri málum.

Umsækjendur fá skriflegt svar um afgreiðslu innan fjögurra vikna frá því að umsókn berst. Synjunarbréf innihalda rökstuðning fyrir synjuninni og upplýsingar um hvert umsækjandi geti snúið sér ef hann er ósáttur með niðurstöðuna. Í jákvæðu svari kemur annaðhvort fram að viðkomandi sé kominn á biðlista eftir þjónustu eða þá að hann fær tilboð um þjónustu.

10. gr.

Samningur um þjónustu.

Umsækjandi og þjónustuaðili gera með sér skriflegan samning um hvernig sérstakur stuðningur verði veittur. Notast skal við þar til gerð eyðublöð. Miðað skal við að gengið sé frá samningi innan tólf mánaða frá því umsókn berst sveitarfélagi.

11. gr.

Einstaklingsbundin þjónustuáætlun.

Jafnhliða samningi um þjónustu skal gerð þjónustuáætlun sem felur í sér skýr markmið sem vinna skal að með því að veita stuðning og samhæfa úrræði mismunandi þjónustuaðila. Gerð áætlunar er á ábyrgð þeirra sem sjá um framkvæmd þjónustunnar. Þjónustuáætlunin skal endurmetin eigi sjaldnar en einu sinni á ári.

12. gr.

Eftirfylgni þjónustu.

Eftir þrjá mánuði er viðkomandi og/eða aðstandandi hans boðaðir á fund til að meta hvernig til hefur tekist og fara yfir hvort eitthvað megi betur fara.

13. gr.

Niðurstaða synjunar og málskot til málsmeðferðarnefndar.

Kynna skal umsækjanda niðurstöðu umsóknar svo fljótt sem unnt er. Sé umsókn hafnað í heild eða að hluta skal umsækjandi fá skriflegt svar þar sem forsendur synjunar eru rökstuddar. Synjun þjónustuhóps má skjóta til málsmeðferðarnefndar byggðasamlags um málefni fatlaðra á Norðurlandi vestra, og skal það gert skriflega innan þriggja mánaða frá því að umsækjanda berst vitneskja um synjun. Málsmeðferðarnefnd skal fjalla um umsókn og taka ákvörðun svo fljótt sem unnt er.

14. gr.

Málskot til úrskurðarnefndar félagsþjónustu.

Umsækjandi getur skotið ákvörðun málsmeðferðarnefndar til úrskurðarnefndar félagsþjónustu og húsnæðismála hjá velferðarráðuneytinu. Skal það gert innan þriggja mánaða frá því umsækjanda berst vitneskja um ákvörðun nefndarinnar.

15. gr.

Heimildir til ákvarðana samkvæmt reglum þessum.

Þjónustuhópur byggðasamlagsins tekur ákvarðanir skv. reglum þessum í umboði stjórnar byggðasamlags.

16. gr.

Birting og endurskoðun.

Reglur þessar, sem settar eru skv. 26. og 29. gr. laga nr. 59/1992 um málefni fatlaðs fólks eru birtar í B-deild Stjórnartíðinda, sbr. 55. gr. sömu laga. Reglur þessar skulu endurskoðaðar eigi sjaldnar en á tveggja ára fresti að teknu tilliti til viðeigandi þjónustu- og gæðaviðmiða, sbr. 2. mgr. 3. gr. laga nr. 59/1992 um málefni fatlaðs fólks.

17. gr.

Gildistaka.

Reglur þessar, sem samþykktar voru í stjórn byggðasamlagsins þann 4. desember 2012, öðlast þegar gildi.

Skagafirði, 11. janúar 2013.

F.h. samtaka sveitarfélaga á Norðurlandi vestra,

Jón Óskar Pétursson framkvæmdastjóri.